

PRESENTACIÓN CANDIDATURA **PRESIDENCIA DA DEPUTACIÓN DE PONTEVEDRA**

***Intervención 1ª de Luis López Diéguez | Xoves 6 de Xullo de 2023 | 12.00 horas |
Salón de Plenos do Pazo Provincial***

Bo día a todos e moitas grazas por asistir a este pleno de constitución e toma de posesión da nova corporación provincial da Deputación de Pontevedra.

Quero agradecer especialmente a presenza do presidente da Xunta, Alfonso Rueda, dos conselleiros do Goberno galego, das alcaldesas, alcaldes e concelleiros dos 61 concellos e de moitos representantes da vida económica, social, cultural, veciñal ou deportiva da provincia de Pontevedra.

Como consecuencia do resultado das eleccións municipais do pasado 28 de maio, o Partido Popular obtivo a maioría absoluta na representación desta cámara provincial a través dos cargos electos dos sete partidos xudiciais que a conforman: Vigo, Pontevedra, Cambados, Tui, Ponteareas, Lalín e A Estrada.

O Partido Popular gañou as eleccións municipais e foi a forza máis votada na provincia de Pontevedra e é a formación política que goberna en maior número de concellos tras a constitución das corporacións municipais do pasado 17 de xuño.

Somos o único partido con representantes provinciais procedentes dos sete partidos xudiciais de Pontevedra e gañamos, con maioría absoluta de representantes, en seis deles.

Por elo, e como forza maioritaria desta cámara provincial, correspóndenos gobernar a Deputación de Pontevedra durante os vindeiros catro anos.

Somos un partido con vocación de servizo público e de goberno, que dirixiu esta institución durante 32 anos entre 1983 e 2015, pero que tamén atendeu a todos os cidadáns da provincia desde a oposición nos dous derradeiros mandatos.

Sen embargo, os veciños e veciñas determinaron, coa elección dos seus concelleiros e concelleiras o pasado 28 de maio, que querían un cambio na xestión e no modelo político e outorgáronnos a confianza maioritaria para volver a rexer os destinos desta institución.

E presentámonos a este pleno de toma de posesión e constitución cos deberes feitos, cun equipo de goberno moi potente, con xente con liderado, capacidade de traballo, coñecemento político e cercanía social. Presentámonos, con toda a humildade, cun proxecto transversal e global para a provincia de Pontevedra, baseado e centrado nos 61 concellos, que para nós son o eixo de todo e as administracións que outorgan todo o sentido á Deputación de Pontevedra. Os concellos son a alma desta institución e a eles e por eles dirixiremos toda a nosa acción de goberno.

E con esta liña de traballo, quero agradecer a confianza que depositaron en min os meus compañeiros e compañeiras do Partido Popular para que opte, se o pleno desta cámara así o considera, á presidencia dunha institución tan importante como a Deputación de Pontevedra.

Sempre dixen e digo que nunca busquei protagonismos, pero tampouco nunca fuxo das responsabilidades. E por elo, co apoio dos meus compañeiros, coa máxima humildade e vocación de servizo público, cun ánimo de traballo absoluto e coa intención de modernizar e acadar avances para a provincia, centrados principalmente en axudar aos concellos e aumentar a calidade de vida dos pontevedreses, teño a ben presentar a miña candidatura á presidencia da Deputación de Pontevedra ante esta cámara.

Agardo, porque así mo transmitiron e lles reitero o meu agradecemento, contar co respaldo dos 14 representantes do Partido Popular e tamén, con total humildade, gustaríame pedir a confianza dos deputados provinciais dos grupos socialista e do BNG.

Teño a intención de gobernar esta institución sen sectarismos, pensando e atendendo aos 61 concellos da provincia, sen importar o signo do seu goberno político e centrándonos exclusivamente no benestar dos cidadáns da provincia.

Sen máis, quero reiterar o meu máximo respecto e consideración ante esta cámara provincial pola acollida e, dende este momento, pñoome á súa disposición como candidato á presidencia da Deputación de Pontevedra.

Moitas grazas.